

Fasnacht 2019



Nachtschwärmer

S'Lied 079, wo me öfters gheert
Het d'JUSO Chefin schuurig gsteert
Si findets schyynts sexistisch, doch mir wisse, was si bloggt
Logisch het bis jetz no kaine, nach iirer Nummere gfroggt

Mir wisse, ass im Groosse-Root
Albe doch no ebbis goot
Stimmig wägeme schloofende Goof, e Fall, wo jeede kennt
Es kunnt dert sicher nid druff aa, öb aine meh oder weniger pennt

Yes and no, oh shit, maybe
Ihr wänd sicher alli wüsse, was verzellt denn däa
Mit Änglisch kunnt me besser duure, es goot hüt fascht nüm ooni
Drum gänd mir gärn dä Änglisch-Kurs, für dr Burgener und Ceccaroni

Als Drämmli Faarer, s'isch nid verkehrt
Bisch bi de Fraue heiss begehrt
Meischtens sind si zimlig nätt, und gänd sich au no Mieh
Und s'Beschte an de Drämmli Faarer, si kömme garantiert nid z'fried

D'Chineese händ, woolverstande
E Sonde hinter em Mond lo lande
D'Chineese meine, si sige die Erschte, Gröössewaan wie gwohnt
Mir Schwizer sind do schnäller gsi, mir händ d'Zircher hinter em Mond

D'Baasler Schugger wänd immer s'Neuschte
Me weiss jo, sii sind nid die Schläuschte
Fir huffe Gäld händ's Teslas kauft, statt Sprit kunnt Stroom dört drii
No händ si nooni usefunde, öb dä Stroom muess bleyfrey sii

Drotz NEI stöönd mir ganz klaar drzue
Hörner verschöönere jeedi Kueh
S'Ärschiinigsbild wird vuyil schööner, d'Wirggig isch massiv
Mit Höörner wär vilicht sogar d'Martullo-Blocher attraktiv

In Ziiri, s'isch e Sensation
Git's doch no e Fuessballstadion
Ziiri passt sich Baasel aa, wo e super Stadion het
Baasel passt sich Ziiri aa, schuttet schlächt wie dr FCZ

Fir d'Merkel wird's jetz langsam knapp
Es goot nim lang, denn tritt si ab
Ainersits, ass si goot, do verdient si unser Loob
Anderersits, was nooche kunnt, isch sicher wieder e Schwoob

Dr FCB het jubiliert
D'Männer händ ooni Fraue gfiirt
Die händ miesse Lööslü verkaufe, so öbbis darf nid passiere
Hätte mir öbbis z'saage gha, mir hätte si lo serviere

Wottsch au by uns bänggle?
Uff www.vsg-basel.ch erfahrsch meh!

